

# Priroda i društvo

Informativni bilten Udruženja Eko akcija Sarajevo

Br. 1, oktobar 2020.

## **Šta nam je donijela hitna sjednica Skupštine Kantona Sarajevo 8. oktobra o deponiji Smiljevići i problemu odlaganja otpada?**

**Mjere koje je usvojila Skupština ne rješavaju osnovni problem deponije:**

### **NEKONTROLISANU EMISIJU DEPONIJSKOG GASA**

Deponijski gas, koji nastaje raspadanjem otpada, glavni je izvor smrada i zdravstvenih problema za desetine hiljada stanovnika okolnih naselja.

Za šest sati sjednice zastupnici nisu uspjeli shvatiti koji je glavni problem deponije, a nadležni ministri uopće se nisu trudili da im u tome pomognu – upitno je da li i oni razumiju čime bi se trebali baviti. Zastupnici jesu postavljali niz pitanja o pojedinim detaljima rada deponije – samo većina tih pitanja nije ni u kakvoj vezi sa rješavanjem osnovnog problema deponije.

Skoro svi zastupnici u Skupštini su profesionalci – Skupština im je radno mjesto, a opis posla - rješavanje problema građana. Na plate zastupnika i njihove stranke, potroši se skoro tri miliona godišnje. Jedna sjednica Skupštine poput ove hitne o deponiji nas košta preko 200.000 KM. Naših para.

**Sjednici su prisustvovala svega 24 zastupnika od njih 35. Skoro trećini političkih predstavnika u Skupštini Kantona neuređena deponija izgleda uopće ne predstavlja problem**

**Doneseno je ukupno DVADESET prijedloga mjera.  
OSAM mjera se tek djelomično odnosi na zahtjeve stanovništva.  
Za njihovo sprovođenje nema rokova niti su imenovane odgovorne osobe.**

**Trenutno stanje na deponiji:**

Zbog toga što nova ploha kasni godinu dana, gradski komunalni otpad se i dalje istovara na već zatvoreni dio deponije.

**NA DEPONIJI SMILJEVIĆI JOŠ UVIJEK NEMA MJESTA ZA PROPISNO ODLAGANJE OTPADA.**

## **KRATAK PREGLED ispunjenja zahtjeva stanovništva iz naselja oko deponije:**

1. Hitno izdvajanje novca iz budžeta Kantona za sve potrebne radove na sanaciji deponije.

- Pravljenje nove plohe na deponiji Smiljevići, novim kreditom, koje reklamiraju i Vlada i Skupština KS kao epohalno postignuće i odgovor na proteste građana, uopće nije bio jedan od zahtjeva sa protesta održanog 24. septembra.

**Pravljenje nove plohe moralo bi biti REDOVNA AKTIVNOST. Svake godine bi se moralo redovno finansirati iz redovnih prihoda komunalnog preduzeća, a ne iz kredita.**

2. Ponovno pokrivanje nepropisno pokrivenih dijelova deponije i postavljanje dodatnih dijelova sistema za prikupljanje i eliminisanje deponijskog gasa koji guši i truje okolna naselja i cijeli grad.

- Vlada je zadužena da planira sredstva u Budžetu Kantona za 2020. i 2021.godinu, kako bi se provele mjere planirane Programom sanacije za period 2016-2020.godina, uključujući uspostavu sistema za prečišćavanje procjednih voda.

**Ovom mjerom NE se spominje se izričito sanacija problema deponijskog gasa. Program sanacije predviđa samo rad novih ploha – NE saniranje starih.**

- Ministarstvo prostornog uređenja i zaštite okoliša u svom izvještaju na sjednici ustvrdilo je da otplinjavanje funkcioniše.

**Problem je što se na deponiji prikuplja samo mali dio deponijskog gasa jer plohe nisu propisno pokrivene. BEZ SANIRANJA PLOHA – NEMA RJEŠENJA PROBLEMA SMRADA I ZAGAĐENJA.**

3. Nezavisna kontrola kvaliteta pokrivanja deponije s redovnim mjerenjima koncentracije deponijskog gasa. **Nezavisna kontrola kvaliteta pokrivanja nije obezbijeđena.**

- **Zavod za javno zdravstvo počinje raditi monitoring zagađenja zraka u okolini deponije.**

- **Ministarstvo prostornog uređenja, građenja i zaštite okoliša treba da nastavi i ubrza postupak nabavke analizatora koji će biti instalirani u mobilnu stanicu za mjerenje kvaliteta zraka.**

4. Redovno obavještanje stanovništva o koncentracijama gasa na rubovima deponije (na Internetu i lokalno postavljenom ekranu).

**Donesena je mjera koja predviđa da će nadležni TEK POKUŠATI da ovo obezbijede.**

5. Izrada zakonodavnog okvira, tehničkih uputstava i pratećih tehničkih standarda na nivou Kantona Sarajevo kojima bi se detaljno uredio svaki segment rada deponije - bez čekanja na neizvjesne akcije federalnih vlasti.

- Kreće se u izmjene Zakona o komunalnoj čistoći i pripremu posebnog propisa o upravljanju komunalnim otpadom.

**NIJE PRECIZIRANO ŠTA TREBA DA DONESU TE IZMJENE NITI JE POSTAVLJEN ROK.**

- Ministarstvo komunalne privrede i infrastrukture i KJKP "Rad", zajedno s Ministarstvom prostornog uređenja, građenja i zaštite okoliša, treba da pripreme Pravilnik o održavanju i bližim uslovima za korištenje deponije Smiljevići i mjerama zaštite sa aspekta zaštite tla, vodotoka i vazduha.

**NEMA ROKA.**

6. Imenovanje odgovornih i postavljanje rokova za svaku od traženih mjera, uz obavezivanje Vlade i Skupštine da će nerealizacija mjera po automatizmu i momentalno rezultirati smjenama imenovanih.

**Ovaj zahtjev su i Vlada i Skupština u potpunosti ignorisale.**

**Bez obzira kakvo će biti novo, trajno rješenje problema odlaganja otpada, npr. pominjana spalionica ili izmještanje deponije, ova deponija mora biti u potpunosti sanirana. Ako se to ne uradi, čak i da sutra prestane odlaganje otpada, deponijski gas će se nastaviti stvarati narednih 40 godina, a procjedne vode deponije zagađivaće tlo i vodotoke barem još cijelo jedno stoljeće.**

Iz predloženih mjera nazire se tek djelomično rješenje problema. Rokova nema niti garancija da će mjere biti sprovedene kako treba, a ne kozmetički, što je do sada bio slučaj.

**NAJBITNIJE: STARE PLOHE SE NE TRETIRAJU, A BEZ TOGA – SVE OSTAJE PO STAROM.**